

U odobrenim aneksima navodi se i to da će Vlada RS-a do posljednjeg trenutka odgoditi primjenu evropskih propisa.

Vlada bh. entiteta Republika Srpska odobrila je tri aneksa koncesionih ugovora kompaniji „Comsar Energy Republike Srpske“. Uz nove anekse odobrene su i nove pogodnosti. Tu kompaniju osnovali su „Comsar Energy“ ruskog biznismena Rašida Serdareva i Vlada entiteta RS-a, mada je gotovo u stopostotnom vlasništvu Comsara, javlja reporterka Al Jazeera Ljiljana Smiljanić.

Comsarova TE Ugljevik 3 već je trebala da proizvodi struju uz postojeću, državnu termoelektranu. Novim aneksom ugovora o koncesiji, Vlada RS-a produžila je rok za izgradnju.

U odobrenim aneksima navodi se i da će Vlada RS-a do posljednjeg trenutka odgoditi primjenu evropskih propisa, da Comsar može da raskine ugovor, ukoliko im institucije ne budu osigurale sve dozvole u roku od dva mjeseca. Također, Vlada će da nadoknadi štetu ukoliko u budućnosti budu usvojeni propisi na štetu Comsara.

Urednik poslovnog portala Capital Siniša Vukelić kaže da su pojedine odredbe potpuna novost u koncesionim ugovorima. Zato su i upitne, kaže Vukelić.

‘Pojasniti nove anekse’

„Da je vrlo upitna odredba, koja govori da koncesionar, što je zaista nepoznato prema našim zakonskim propisima, može da upiše pravo vlasništva i pravo svojine nad zemljištem i nepokretnostima u opštini Ugljevik, koje će u narednom periodu eksploatisati“, kaže Vukelić.

Ovakva tumačenja aneksa ugovora u Comsaru ocjenjuju zlonamjernim. Podsjećaju da su do sada u BiH uložili 50 miliona eura. Sasvim je normalno, kažu, da ugovorom zaštite svoju investiciju.

„Za zemlju, koju mi steknemo na osnovu drugog pravnog osnova, na osnovu kupoprodaje, tu se upisuje pravo vlasništva. Ugovorom o koncesiji je jasno propisano da je obaveza rješavanja imovinsko-pravnih odnosa na nama, investitorima i, gdje je proglašen javni interes, biće upisana zabilježba“, objašnjava Siniša Majstorović iz kompanije Comsar Energy RS.

Zabilježila je i Komisija za koncesije RS-a da bi nove anekse trebalo bolje pojasniti. Upozorili su da će RS preuzeti više odgovornosti, ali su ipak dali i saglasnost.

izvor: balkans.aljazeera.com